



Galiza tira de Portugal cara o norte

Description


Os romanos colocaron en provincias diferentes, Gallaecia e Lusitania, os espazos setentrional e meridional do país veciño. División caracterizada, agora, pola concentración da poboación arredor de Lisboa e Porto, cidades que lideran os territorios daquelas antigas provincias e compiten entre elas. O mapa por distritos dos resultados electorais do día 10 no Portugal continental, que recolle a forza política gañadora en cada lugar, está influído por esa realidade. Como viña de facer Galiza uns días antes, o norte inclinouse máis pola dereita, Alianza Democrática, reflexada en color máis claro. O sur votou maioritariamente socialista, salvo no Algarve onde gañou Chega.

A entrada do país na UE, simultaneamente con España, provoca que o convento Bracarense da Gallaecia, orixe de Portugal, estea a converxer co Lucense, a actual Galiza. Un proceso que sacou a esta do seu illamento dentro dunha España pechada. Despois de nove séculos, Galiza volve sentirse norte e tende crecer por riba da media das comunidades autónomas. Máis alá do Miño, a área setentrional de Portugal tamén se beneficia dunha nova dinámica, económica e cultural, que traslada cara Porto o centro dun eixo atlántico integrado.

O medo de Lisboa a ficar no límite sur desa zona e perder liderado económico, xustifica, por exemplo, o que aconteceu en febreiro, durante a celebración de Fitur no IFEMA, cando o alcalde lisboeta chegou a un acordo coa presidenta de Madrid para premeren a favor de que o goberno portugués cambie de criterio e de prioridade á comunicación ferroviaria entre as capitais, en detrimento da conexión setentrional. O acordado non vai servir de moito porque precísase diñeiro europeo para a necesaria modernización do sistema ferroviario portugués e a lóxica da economía do transporte leva a que a UE se centre en conectar a liña de cidades, portos, aeroportos e plataformas loxísticas da costa atlántica ao norte de Setúbal.

As recentes eleccións parecen indicar que a parte do territorio que máis apoia a rexionalización aposta pola tendencia política menos estatalista, mentres lideran o sur os máis orientados a exercer poder desde unha administración forte. Portugal necesita descentralizar un aparato público demasiado pesado, lento e ineficiente, o principal problema do país. Lisboa resístese e como, despois do 10 de marzo, non hai unha clara maioría de goberno, seguirase adiando o asunto.

Pero, mal que lle pese á capital, a natural integración da Galiza co resto da costa occidental da península seguirá tirando de Portugal cara o norte e agravando antigas tensións, reforzadas por un centralismo que vai deixando de ser central.



APARTADOSTEMATICOXEOGRAFICOS

Europe

ETIQUETAS

Portugal Eleccións

INVESTIGACION

Gallician Observatory of Lusophony

Date Created

March 17, 2024

Meta Fields

Autoria : 4127